

A PROPOSIT DAL "GJNGJLLO,,

Siôr Diretôr,

o soi e mi sint rût furlan. Zà fa cuaichi di, une siorute mi à proponût di fâ l'abonament al vuestri gjornâl e, di bon furlan, lu vares fat ancje volintîr. Cuanche però mi à mostrade la copie n. 0 anade 1978, o soi restât scaturît e deludût che un gjornâl, cun tant di cjarte d'identitât furlane, al criticas tune maniere vergognose Radio Effe e il so Diretôr cul articul, cence firme, «Un Gingillo pal Friûl».

O scrupùli che nè il Diretôr de Radio Effe nè chêi ch'a dan une man insieme cun lui e nancje chêi ch'a scoltin no vetin vût gust di lei l'articul che Lui al à fat stanpâ tal So gjornâl, là ch'al diseve ancje mo alc di bon in merit.

Par dî il vêr, mi à parût pôc onest tai confronz de Radio Effe, dai siei colaboratôrs e di chêi ch'a sintin, disintjur STURNEL e alc par dongje.

Mandi.

Franco Gressan - Lauc -

No stin cumò a fâle plui grande di ce che jè, senò nus sucêt come chê de magne. La sajal? Un al diesve di vê viodude une magne di doi metros e mieç. E chelâtri j contà ch'al veve bevût, tune di, cinc litros di sgnape. «Inpuissibil!» dissal il prin. «Alore - j rispuindè il secont - tù scurte la to magne, che jò o scurtarai la me sgnape».

Il fat stes che l'articul al fevelas di sturnel, al singulâr, nol podeve par mai dâur dal sturnel a dute chê int ch'al dîs Lui. E po', s'al à let pulît, al diseve che meriz Radio Effe and'â. Par chel nus à displasût che un aradio cun tantis pussibilitâz di jessi scoltât e di fâsi scoltâ, al fos lat a finîle tune robe che, onestamentri, a part la vajuçade e il grop di un moment, nol zove cuissà ce pal Friûl. Al sares stât cetant miôr, par esenpli, sielgi une scuele ad an di comedâle, magari tai paisûz piçui la che nissun nol rive e fâ alî, ganbiant ogni an, un licôf o ben, fâur scrivi ai fruz une letare paronp a duc' i responsabii regjonâi e plui in sù par dîur s'a crodin di podê tirâ indenant cun chest pas di cai. Parceche, cul «gingillo» (une peraule che si condane da sè pe slàcare che ti fâs vignî a la ment), no si risolf redensie di nuje. E Radio Effe, j ripet, e pò fâ tant. Baste ch'a seti furlane di non e di fat e che no disj che no si ha di pulitiche. Atriche che si à si fâle; baste fâle pai furlans, cence pore. Al viodarà che la int no distudarà l'aradio cuanche us sintarà a sunà pal tinp cuintri di certe int che à lis mans in paste.

Pal rest, no vares grandis robonis. Cert che se un al condane un gjornâl par un tasselut, ancje nô o podaressin condanâ la Radio Effe e i siei responsabii cjapant a spieli la trasmission che àn fate cuintri dal articul, cence sparagnâ nè ofesis nè pleris che lis sintivìn par dut il Friûl. O ben molant la telefonade di chê femine che, mi àn contât, e à berlât: «I predis ch'a fasin i predis e vonde!» No varà migo cjapât i predis par pissighez ch'a vegnin a puartâ vie i muarz e fertic? E se cjacare jê, parcè no puedio cjacarà ancje jò.

Al Diretôr j vores fâi savê che la so inissiative le vevin condanade, e in maniere unevore piês de nestre, inmò l'an passât sul gjornâl propit dai taramotâz «IN UAITE», tal numar di genâr dal '78 a pag. 6, sot il titul «Retorica e gingilli non bastano per ricostruire il Friuli. I risvolti organizzativi e finanziari dell'operazione «un gingillo per il Friuli» organizzata da Radio Effe. Come si sfrutta l'emotività del Natale per distogliere la gente dai reali problemi del momento». E, in bande, «Ce ch'a pensin de fieste i plevans de Foranie di Glemone». Spietial un an a inrabiâsi?

Lui, amancul si è inrabiât subit, a colp. E o speri che ancje j passi a la svelte cuanch'al varà cirût di capî ce che si voleve dî.

Març 1979

Pre Antoni Beline